



# **STATUT**

## **Islamske zajednice Bošnjaka u Švedskoj Džemat Stockholm**

Org. Nr. 802017- 6882

# **SADRŽAJ**

- I. OPĆE ODREDBE
- II. FINANSIJE
- III. ČLANSTVO
- IV. ORGANIZACIJA DŽEMATA
- V. FUNKCIJE
- VI. IZBORNI SISTEM
- VII. IMOVINA DŽEMATA
- VIII. OPĆI AKTI
- IX. PRELAZNE I ZAVRŠNE ODREDBE

Na osnovu člana 22. Pravilnika o organiziranju Islamske zajednice u Bosni i Hercegovini u dijaspori, odredaba člana 9. Statuta Islamske zajednice Bošnjaka u Švedskoj, Skupština BIZ Stockholm je na svojoj sjednici održanoj 28. 11. 2020. godine donijela Statut Islamske zajednice Bošnjaka u Švedskoj – Džemat Stockholm (u daljem tekstu Džemat).

## **I. OPĆE ODREDBE**

### **Član 1.**

(Predmet)

Ovim Statutom uređuju se naziv, sjedište, pravni status, svrha i ciljevi, osnov djelovanja, finansije, članstvo, prava i obaveze članova, organizacija Džemata, unutarne ustrojstvo, organi Džemata, njihov rad, sastav, izborni sistem, opoziv, ovlasti, odgovornosti, način odlučivanja i trajanja mandata, te prelazne i završne odredbe, prestanak postojanja kao i druga pitanja značajna za rad Džemata.

### **Član 2.**

(Naziv)

Puni naziv Džemata je:

Na bosanskom jeziku: Islamska zajednica Bošnjaka u Švedskoj – Džemat Stockholm.

Na švedskom jeziku: Bosniakiska Islamiska Samfundet – Församlingen Stockholm.

### **Član 3.**

(Sjedište)

Sjedište Džemata je u Stockholmu.

### **Član 4.**

(Pravni status)

Džemat ima svojstvo pravnog lica.

### **Član 5.**

(Krovna organizacija)

Džemat je sastavni dio Islamske zajednice Bošnjaka u Švedskoj (IZBuŠ), a time i dio Islamske zajednice u Bosni i Hercegovini (IZ u BiH).

### **Član 6.**

(Svrha i cilj)

(1) Svrha Džemata je da, u duhu islamskog učenja, čuva i razvija vjerski život među muslimanima i podstiče ih na vjerske i humanitarne akcije.

(2) Ciljevi Džemata su:

- očuvanje i proklamovanje svih vrijednosti islama,
- islamski odgoj i obrazovanje svih pripadnika Džemata,

- u skladu sa svojim mogućnostima, osigurati svojim pripadnicima uslove za izvršavanje islamskih dužnosti.

(3) Ciljevi Džemata ostvaruju se:

- brigom o islamskom odgoju i obrazovanju svojih pripadnika i zalaganjem za očuvanje vrijednosti braka i porodičnog života,
- organizovanjem vjerskih aktivnosti u Džematu,
- podsticanjem humanitarnih aktivnosti,
- očuvanjem, jačanjem i zaštitom bošnjačkog identiteta i njegovanjem bosanskog jezika,
- radom na aktivnostima koje doprinose dijalogu, uzajamnom poštovanju i toleranciji među svojim članovima, kao i među ostalim narodima i narodnostima,
- pružanjem mogućnosti sticanja osnovnih znanja u islamskom vjerovanju, Kur'anskom pismu, vlastitoj historiji i kulturi,
- organizovanjem mektepske nastave,
- podsticanjem ženskog aktivizma, rada sa omladinom i rada sa starijim članovima,
- jačanjem materijalne osnove Džemata,
- redovnim informisanjem članstva,
- dosljednim sprovođenjem odluka viših organa Islamske zajednice,
- saradnjom sa drugim zajednicama i organizacijama u aktivnostima i korisnim djelatnostima kojima se doprinosi obrazovanju, miru, pravdi i dobru među ljudima.

## **Član 7.**

(Osnov djelovanja)

(1) Džemat svoje ustrojstvo organa i djelovanja temelji na Kur'an-i kerimu i sunnetu Muhammeda alejhi-selam, islamskoj tradiciji Bošnjaka i zahtjevima vremena.

(2) Džemat u svom radu postupa u skladu s Ustavom IZ u BiH i njenim drugim aktima koje, u okviru svoje nadležnosti, donosi Sabor Islamske zajednice, reisul-ulema, Vijeće muftija, Rijaset, odnosno nadležna predstavnička tijela i IZBuŠ.

(3) U tumačenju vjere i izvršavanju ibadetskih islamskih dužnosti, Džemat primjenjuje maturidijski akaid i hanefijski mezheb, stara se za ispravno razumijevanje i življenje islama, štiti vjerska prava muslimana, te osigurava uvjete za prenošenje emaneta s ciljem da svi pripadnici Džemata žive u skladu s islamskim normama, a što se ostvaruje promicanjem dobra i odvrćanjem od zla.

## **Član 8.**

(Jezik)

(1) Džemat u svom djelovanju koristi bosanski jezik kao službeni jezik.

(2) Džemat dopušta da se njegovi vjerski autoriteti i predstavnici obraćaju i na švedskom jeziku, odnosno da se koriste švedskim jezikom.

## **Član 9.**

(Poslovna godina)

Poslovna godina Džemata je od 1. januara do 31. decembra.

### **Član 10.**

(Zastupanje i potpisnici Džemata)

(1) U administrativnim, finansijskim i imovinsko-pravnim poslovima prema trećim licima Džemat predstavlja i zastupa predsjednik Džematskog odbora, a u poslovima vjere i odgoja prvi imam Džemata.

(2) Potpisnici Džemata su najmanje četiri člana Džematskog odbora zajedno ili predsjednik i sekretar zajedno.

### **Član 11.**

(Vizuelni identitet i pečat)

(1) Džemat koristi vizuelni identitet, logo i znak IZ u BiH.

(2) Džemat ima pečat okruglog oblika sa znakom IZ u BiH i nazivom Džemata.

## **II. FINANSIJE**

### **Član 12.**

(Finansije)

Džemat se finansira:

- članarinom,
- doprinosima svojih članova, švedskih državnih i drugih institucija,
- pružanjem određenih usluga svojim članovima i ostalim vjernicima,
- doprinosom džematskog pogrebnog društva,
- drugim sredstvima koje Džemat realizira svojim radom.

## **III. ČLANSTVO**

### **Član 13.**

(Član)

(1) Član Džemata može biti svako fizičko lice koje prihvata ovaj Statut i plaća članarinu.

(2) Članarina se, pomoću poreske uprave, plaća procentualno od bruto oporezovanih primanja, a prema Pravilniku o jedinstvenoj članarini i vjerskim uslugama kojeg donosi Skupština IZBuŠ-a.

### **Član 14.**

(Prava i obaveze člana)

(1) Prava člana Džemata su:

- da slobodno izražava svoju pripadnost islamu i izvršava islamske dužnosti,
- da se islamski odgaja i obrazuje,

- da koristi džematske prostorije za izvršavanje vjerskih obreda shodno važećim pravilima,
- da sudjeluje u zajedničkim aktivnostima u Džematu,
- da učestvuje u izborima za organe i druga tijela Džemata i Islamske zajednice,
- da bude pravovremeno obavještavan o radu organa Džemata i organa i ustanova Islamske zajednice,
- da se obraća organima Džemata i Islamske zajednice radi zaštite svojih vjerskih prava,
- da u okvirima odgovarajućih propisa koristi imovinu Džemata,
- da uputi prijedlog/ideju na razmatranje i odluku Džematskom odboru,
- da uputi prijedlog/ideju na razmatranje i odluku Skupštini,
- da koristi i druga prava regulisana u Pravilniku o jedinstvenoj članarini i vjerskim uslugama IZBuŠ-a.

(2) Obaveze člana su:

- da poznaje i primjenjuje propise Islamske zajednice i štiti islamske vrijednosti,
- da ne krši Statut Džemata,
- da ne opstruira rad Džemata te ostvarivanje ciljeva Džemata,
- da ne opstruira i krši odluke organa Džemata,
- da plaća članarinu.

#### **Član 15.**

(Prestanak članstva)

(1) Članstvo u Džematu prestaje smrću, na vlastiti pismeni zahtjev sekretarijatu IZBuŠ-a ili isključenjem zbog grubog kršenja odredaba ovog Statuta.

(2) Odluku o isključenju donosi Skupština IZBuŠ-a na prijedlog Izvršnog odbora IZBuŠ-a ili Skupštine Džemata.

(3) Prijedlog o isključenju Skupštini Džemata dostavlja Džematski odbor nakon provedene procedure definisane Pravilnikom o disciplinskim mjerama.

## **IV. ORGANIZACIJA DŽEMATA**

#### **Član 16.**

(Organi Džemata)

Organi Džemata su:

- Skupština
- Džematski odbor
- Nadzorni odbor
- Izborna komisija

## **Član 17.** (Skupština)

(1) Skupština je najviši organ Džemata, a sačinjavaju je članovi džemata koji su navršili osamnaest godina.

(2) Redovna skupština održava se jednom godišnje i to najkasnije do 31. marta. Poziv za Redovnu skupštinu šalje se najranije 6 sedmica, a najkasnije 4 sedmice prije održavanja Skupštine.

(3) Vanredna skupština saziva se ukoliko to zahtijeva:

- Džematski odbor
- Nadzorni odbor
- Najmanje 10% članova džemata
- Izvršni odbor IZBUŠ-a

Poziv za Vanrednu skupštinu šalje se najranije 6 sedmica, a najkasnije 2 sedmice prije održavanja Skupštine.

(4) Sazivanje, rad i odlučivanje na sjednicama skupština odvija se prema Pravilniku o radu Skupštine.

(5) Skupština može zasjedati i punopravno odlučivati kada istoj prisustvuje minimalno 5% od ukupnog broja članova.

(6) Skupština odlučuje većinom glasova prisutnih članova. Izuzetak je odlučivanje o Statutu, izmjenama i dopunama Statuta kao i odluka o raspuštanju Džemata, koje Skupština usvaja dvotrećinskom većinom prisutnih članova (vidi član 34., 39. i 41.).

(7) Zadaci redovne Skupštine su:

- donosi odluke koje se tiču organizacije i aktivnosti Džemata i vjerskog života u Džematu,
- bira članove organa Džemata i zastupnike Džemata u Skupštinu IZBUŠ-a,
- pokreće inicijativu za izgradnju ili kupovinu objekata Džemata,
- daje smjernice Džematskom odboru za preduzimanje mjera s ciljem poboljšanja vjerskog života u Džematu,
- razmatra i usvaja izvještaje Džematskog odbora o njegovom radu i poslovanju, te ga oslobađa od odgovornosti za rad u prethodnoj godini,
- usvaja godišnji plan rada i finansijski plan,
- usvaja Statut i pravilnike o radu organa Džemata, kao i druge normativne akte,
- obavlja i druge poslove iz svoje nadležnosti.

(8) Dnevni red redovne Skupštine:

1. Otvaranje Skupštine
2. Izbor radnog predsjedništva
3. Izvještaj o prisutnosti članova i utvrđivanje kvoruma
4. Izbor ovjerivača zapisnika
5. Utvrđivanje pravilnosti procedure sazivanja Skupštine
6. Utvrđivanje dnevnog reda
7. Izvještaj o radu za prethodnu godinu
8. Finansijski izvještaj za prethodnu godinu

9. Izvještaj Nadzornog odbora za prethodnu godinu
10. Razmatranje i usvajanje izvještaja podnesenih u tačkama 7, 8 i 9
11. Oslobođanje od odgovornosti Džematskog odbora za rad u prethodnoj godini
12. Predstavljanje Plana rada za narednu godinu
13. Predstavljanje Finansijskog plana za narednu godinu
14. Razmatranje i usvajanje planova predstavljenih u tačkama 12 i 13
15. Objavljivanje izbornih rezultata
16. Pismeni prijedlozi
17. Informacije od Džematskog odbora i pitanja članova
18. Zatvaranje Skupštine

(9) Skupština u vanrednim uslovima

U slučaju vanrednih uslova, koje propisuju i donose nadležni državni organi ili organi IZ u BiH, po kojima nije moguće da se sazove i održi redovna Skupština, najbitnije odluke iz domena Skupštine će se donositi na način predviđen odredbama Pravilnika o radu Skupštine.

### **Član 18.**

(Džematski odbor)

(1) Džematski odbor upravlja Džematom između Skupštinskih sjednica, a u okviru normativnih akata. Rad, sazivanje i odlučivanje vrši se na način propisan Pravilnikom o radu Džematskog odbora usvojenog na Skupštini Džemata.

(2) Džematski odbor ima sedam članova i tri zamjenika.

(3) Predsjednika, sekretara i blagajnika Džematskog odbora bira Džematski odbor iz reda članova Džematskog odbora, na konstituirajućoj sjednici. U slučaju da se Odbor ne konstituiše u roku predviđenom u Pravilniku o radu Džematskog odbora raspisuju se novi izbori.

(4) Prvi imam je član Džematskog odbora po položaju. Prvi imam određuje se dekretom o postavljenju. Imam ne može vršiti funkciju blagajnika, sekretara ili predsjednika Džematskog odbora.

(5) Drugi imam je zamjenik prvom imamu u Džematskom odboru po položaju.

(6) Prilikom izbora Džematskog odbora biraju se šest članova i dva zamjenika.

(7) Zamjenici se redovno pozivaju na sjednice Odbora. Dobivaju pravo glasa ako je neko od članova Džematskog odbora spriječen da prisustvuje dotičnoj sjednici.

Na određene sjednice po potrebi se mogu pozvati i druga lica, čija stručnost i iskustvo može pomoći u radu.

(8) Članovi Džematskog odbora imaju jednakopravan glas.

(9) Izabrani Džematski odbor obavlja svoju dužnost i poslije isteka mandata sve do konstituiranja novog odbora.

(10) U slučaju da Džematski odbor ne bude oslobođen odgovornosti za rad u prethodnoj godini funkciju Džematskog odbora će, do izbora novog odbora, vršiti tročlano povjereništvo koje imenuje Skupština Džemata.



(11) Džematski odbor je dužan da:

- osigura uvjete za vjerski život u džematu,
- obezbijedi uslove za klanjanje svih pet dnevnih namaza u džamiji,
- provodi odluke Skupštine i viših organa Islamske zajednice,
- vodi brigu o imovini Džemata,
- u koordinaciji sa glavnim imamom učestvuje u odabiru imama u Džematu,
- sprovodi zaključke Skupštine za pribavljanje potrebnih odobrenja i investiciono-tehničke dokumentacije za izgradnju, rekonstrukciju i popravku vjerskih objekata u Džematu,
- Skupštini podnosi Izvještaj o radu i Izvještaj o finansijskom poslovanju,
- Skupštini predlaže Plan rada i Finansijski plan,
- dostavlja Izvršnom odboru IZBuŠ-a Plan rada, Finansijski plan, Izvještaj o radu i Izvještaj o finansijskom poslovanju,
- kao formalni poslodavac odlučuje o zasnivanju radnog odnosa, povremenom angažovanju radnika, prestanku radnog odnosa i privremenom angažovanju, te o platama i nadoknadama,
- donosi Pravilnik o sistematizaciji sa opisom poslova i radnih zadataka uposlenih i brojem izvršilaca,
- donosi po potrebi i druge akte iz svoje nadležnosti,
- odlučuje o nabavci, prodaji i otpisu osnovnih sredstava,
- obavlja i druge poslove iz svoje nadležnosti.

### **Član 19.**

(Nadzorni odbor)

(1) Nadzorni odbor vrši kontrolu cjelokupnog upravljanja i finansijskog poslovanja Džemata, te o tome podnosi izvještaj i definiše određene prijedloge Džematskom odboru i Skupštini. Nadzorni odbor radi i odlučuje na način propisan Pravilnikom o radu Nadzornog odbora.

(2) Nadzorni odbor broji tri člana, a odluke donosi natpolovičnom većinom.

(3) Prilikom izbora Nadzornog odbora bira se i jedan zamjenik. Ukoliko Nadzorni odbor ostane bez jednog člana, zamjenik postaje punopravni član dok se ne izvrši dopuna Nadzornog odbora koja je regulisana Pravilnikom o izborima.

### **Član 20.**

(Izborna komisija)

(1) Izborna komisija priprema i sprovodi izbore u organe i druga tijela Džemata.

(2) Izborna komisija broji tri člana, a odluke donosi natpolovičnom većinom.

(3) Prilikom izbora članova Izborne komisije, bira se i jedan zamjenik. Ukoliko Komisija ostane bez jednog člana, zamjenik postaje punopravni član dok se ne izvrši dopuna Izborne komisije koja je regulisana Pravilnikom o izborima.

(4) Komisija radi i odlučuje na način propisan Pravilnikom o radu Izborne komisije.

## Član 21.

(Ostale komisije)

(1) Komisije mogu biti stalne i povremene (po potrebi), a mogu se imenovati ili birati na skupštinama ili sjednicama Džematskog odbora, ovisno o značaju poslova kojima će se baviti. U pravilu, komisije broje najmanje tri a najviše sedam članova. Za svoj rad odgovaraju organu koji ih je imenovao (izabrao).

(2) Statutarna komisija

- a) Statutarna komisija je stalna komisija koju imenuje Skupština Džemata.
- b) Komisija broji pet članova.
- c) Mandat članova komisije traje četiri godine, s tim da isto lice može biti birano najviše dva uzastopna puna mandata, nakon čega mora pauzirati najmanje jedan puni mandat.
- d) Komisija je zadužena za rad na doradi i promjenama Statuta, pravilnika i drugih normativnih akata.
- e) Komisija daje prijedlog tumačenja Statuta, pravilnika i drugih normativnih akata nadležnom organu.
- f) Komisija radi i odlučuje na način propisan Pravilnikom o radu Statutarne komisije.

(3) Komisija za ženski aktivizam

- a) Komisija je stalna komisija koju imenuje Skupština Džemata.
- b) Komisija broji tri članice, koje između sebe biraju koordinatoricu.
- c) Mandat članica komisije traje četiri godine, s tim da isto lice može biti birano najviše dva uzastopna puna mandata, nakon čega mora pauzirati najmanje jedan puni mandat.
- d) Komisija ima zadatak da koordinira aktivnosti žena u Džematu, te saradnju po pitanju ženskog aktivizma na nivou IZBuŠ-a i IZ u BIH.

(4) Komisija za rad sa omladinom

- a) Komisija je stalna komisija koju imenuje Džematski odbor.
- b) Komisija broji od tri do pet članova od kojih je imam Džemata član po funkciji i predsjedava komisijom.
- c) Mandat članova komisije traje četiri godine, s tim da isto lice može biti birano najviše dva uzastopna puna mandata, nakon čega mora pauzirati najmanje jedan puni mandat.
- d) Komisija se bavi pitanjima vezanim za rad sa omladinom u Džematu.
- e) Komisija radi i odlučuje na način propisan Pravilnikom o radu sa omladinom kojeg donosi Džematski odbor.

(5) Komisija za vakuf

- a) Komisija je stalna komisija koju imenuje Skupština Džemata.
- b) Komisija broji pet članova od kojih su predsjednik Džemata i imam Džemata članovi po funkciji.
- c) Mandat članova komisije traje četiri godine, s tim da isto lice može biti birano najviše dva uzastopna puna mandata, nakon čega mora pauzirati najmanje jedan puni mandat.
- d) Komisija je zadužena za rad na pitanjima vezanim za vakufsku imovinu Džemata.
- e) Komisija radi i odlučuje na način propisan Pravilnikom o vakufu.

(6) Savjet imama

Savjet imama čine svi vjerski obrazovani članovi Džemata čije je vjersko obrazovanje stečeno na verificiranim i priznatim vjerskim obrazovnim ustanovama. Savjetom rukovodi prvi imam Džemata.

(7) Disciplinska komisija

- a) Disciplinska komisija je stalna komisija koju imenuje Džematski odbor.
- b) Komisija može da broji od tri do pet članova, od čega su dva stalna člana. Stalni članovi se biraju na mandat od četiri godine. Ostali članovi se biraju za svaki predmet posebno. Stranke u predmetu imaju pravo da predlože po jednog člana komisije.
- c) Komisija ima zadatak da ispita osnove prijave, provede postupak te da pismeni izvještaj sa prijedlogom mjera dostavi Džematskom odboru na razmatranje i donošenje odluke.
- d) U radu Disciplinske komisije učestvuje imam Džemata, u svojstvu savjetodavnog lica.
- e) Rad Disciplinske komisije je regulisan Pravilnikom o disciplinskim mjerama Džemata.

(8) Komisija za bezbjednost

- f) Komisija je stalna komisija koju imenuje Džematski odbor.
- g) Komisija broji pet članova od kojih su predsjednik džemata i imam džemata članovi po funkciji.
- h) Mandat članova komisije traje četiri godine, s tim da isto lice može biti birano najviše dva uzastopna puna mandata, nakon čega mora pauzirati najmanje jedan puni mandat.
- i) Komisija je zadužena za rad na pitanjima vezanim za bezbjednost u Džematu.

## V. FUNKCIJE

### Član 22.

(Etički kodeks)

Svi članovi organa, uposleni, pripravnici, i osobe koje u radnom vremenu obavljaju poslove za Džemat po osnovu ugovora, te osobe koje obavljaju aktivnosti u organima po osnovu sporazuma bilo koje vrste, podliježu Etičkom kodeksu IZ u BiH a usvojenom od strane IZBuŠ-a.

### Član 23.

(Imam)

(1) Status imama, uvjeti za prijem u službu, prestanak službe, način rada, prava i obaveze te druga pitanja od značaja za rad imama uređuju se Pravilnikom o imamima Islamske zajednice Bošnjaka u Švedskoj.

(2) Džemat i imam ne mogu zaključiti ugovor o obavljanju imamske službe bez Dekreta o postavljenju. Dekret o postavljenju izdaje reisul-ulema u skladu sa šerijatskim i ustavnim ovlašćenjima i predstavlja šerijatsko-pravno ovlašćenje za obavljanje imamske službe.

(3) Imam predstavlja Džemat u stvarima vjere.

(4) Imam je dužan da predvodi svih pet dnevnih namaza u džamiji ili mesdžidu.

(5) Ako je imam slobodan ili, iz opravdanih razloga, spriječen da predvodi neki namaz u džamiji može se povjeriti drugom imam učenom džematliji da to umjesto njega učini.

(6) Imam u slobodno vrijeme može raditi i druge poslove samo ukoliko to nije u suprotnosti sa njegovim zvanjem i ako ne ide nauštrb vršenja njegove službe.

#### **Član 24.**

(Predsjednik)

(1) Zadaci predsjednika Džematskog odbora su sljedeći:

- zastupa i predstavlja Džemat u nadređenim i drugim organizacijama i udruženjima kao i prema organima i organizacijama vlasti u Švedskoj,
- predstavlja Džemat u administrativnim, finansijskim i imovinsko-pravnim poslovima,
- sprovodi odluke Skupštine i Džematskog odbora,
- predsjedava sjednicama Džematskog odbora,
- rukovodi radom uposlenih i povremeno angažovanih radnika, u skladu sa Pravilnikom o organizaciji i sistematizaciji poslova,
- potpisuje ugovore i ostale važne akte Džemata,
- obavlja i druge poslove iz svoje nadležnosti koji su od interesa za Džemat.

#### **Član 25.**

(Sekretar)

(1) Sekretar vodi zapisnike sa sastanaka, čuva arhivu Džemata, šalje obavještenja članovima Džematskog odbora i članovima Džemata, šalje pozive za sastanke Džematskog odbora, šalje pozive za Skupštinu, vodi evidenciju članova i vrši sve poslove vezane za sekretarijat.

(2) Sekretar može potpuno ili djelimično delegirati svoje administrativne zadatke na zaposleno osoblje, a u skladu s posebnim aktom koji će donijeti Džematski odbor.

#### **Član 26.**

(Blagajnik)

(1) Blagajnik obavlja i vrši sve uplate i isplate kako to traži Džematski odbor, a u skladu sa propisima koji su na snazi u Švedskoj. Blagajnik sav novac koji dolazi Džematu iz bilo kojih izvora polaže na bankovni račun Džemata, podnosi tromjesečni izvještaj Džematskom odboru, prikazuje sve prihode i rashode koje je Džemat imao, i uopće vrši sve poslove oko blagajne.

(2) Blagajnik može potpuno ili djelimično delegirati svoje administrativne zadatke na zaposleno osoblje, a u skladu s posebnim aktom koji će donijeti Džematski odbor.

## **VI. IZBORNI SISTEM**

### **Član 27.**

(Biračka prava)

(1) Aktivno biračko pravo u Džematu ima svaki njegov član koji je navršio osamnaest godina.

(2) Pasivno biračko pravo ima svaki član Džemata koji:

- je navršio osamnaest godina i ispunjava ostale uslove definisane u Pravilniku o izborima,
- je član Džemata najmanje tri godine prije izbora u kontinuitetu, i izvršava svoje obaveze po Pravilniku o jedinstvenoj članarini i vjerskim uslugama,
- govori bosanski jezik,
- nije uposlen u Džematu. Definiciju "uposlenog" reguliše Pravilnik o Izborima.

(3) Član sa pasivnim biračkim pravom može se kandidovati samo u jedan stalni organ Džemata.

### **Član 28.**

(Izbori)

(1) Izbori se vrše tajnim glasanjem.

(2) Izbore provodi Izborna komisija na način kako je regulisano Pravilnikom o izborima.

(3) Izbori mogu biti redovni i dopunski.

- Redovni izbori se održavaju u januaru mjesecu svake druge godine.
- Dopunski izbori se moraju provesti za jedan organ Džemata ako se broj članova u tom organu smanji za više od 50%.

### **Član 29.**

(Mandat)

(1) Mandat članova svih organa Džemata traje četiri godine, s tim da isto lice u isti organ može biti birano najviše dva uzastopna puna mandata, nakon čega mora pauzirati najmanje jedan puni mandat.

(2) Kako bi se očuvao kontinuitet rada organa, polovina članova bira se svake druge godine.

(3) Izabrani organi Džemata po potrebi obavljaju svoju dužnost i poslije isteka mandata, sve do izbora, odnosno, proglašavanja izbornih rezultata na skupštini.

### **Član 30.**

(Razrješenje dužnosti)

(1) Nosilac dužnosti u organima Džemata može i prije isteka mandata biti razriješen dužnosti, ukoliko je:

- njegovo ponašanje i rad u suprotnosti sa islamskim normama,
- njegov rad suprotan švedskom zakonu, te propisima i odlukama organa Islamske zajednice i Džemata,
- nesposoban ili nemaran u izvršavanju obaveza u organu u koji je izabran,

- zloupotrijebio svoj položaj,
- podnio neopozivu ostavku.

(2) Postupak razriješenja dužnosti sprovodi se na način kako je regulisano Pravilnikom o disciplinskim mjerama.

### **Član 31.**

(Tranzicioni period)

(1) Nakon izbora, novoizabrani Džematski odbor u novom sastavu do svog konstituisanja, radi paralelno sa postojećim Džematskim odborom, u svrhu planiranja rada.

(2) Svi novi članovi Džematskog odbora, ukoliko to već nisu uradili prije, obavezni su u tranzicionom periodu da prođu kurs za vođenje neprofitnih organizacija.

## **VII. IMOVINA DŽEMATA**

### **Član 32.**

(Imovina)

(1) Imovinu Džemata čine vakufska dobra, imovinska prava, novčana sredstva i druga imovina.

(2) Imovina Džemata služi za djelatnosti kojima se postiže svrha i cilj Džemata i ne može se koristiti u druge svrhe.

(3) Nepokretna imovina Džemata ima status vakufske imovine na koju se odnose pravila i propisi Islamske zajednice o vakufskoj imovini.

## **VIII. OPĆI AKTI**

### **Član 33.**

(Opći akti)

Opći akti Džemata su: Statut, pravilnici, odluke i poslovnici kojima se uređuju pitanja u vezi s djelatnosti Džemata.

### **Član 34.**

(Statut)

(1) Osnovni opći akt Džemata je Statut.

(2) Statut, njegove izmjene i dopune donosi Skupština Džemata dvotrećinskom većinom prisutnih članova, a po prethodno sprovedenoj javnoj raspravi.

(3) Usvojeni Statut ili izmjene Statuta se nakon usvajanja dostavljaju IZBuŠ-u na mišljenje o usaglašenosti sa Statutom IZBuŠ-a.

(4) Nakon pozitivnog mišljenja o usaglašenosti sa Statutom IZBuŠ-a, IZBuŠ šalje Statut Rijasetu Islamske zajednice na mišljenje o usaglašenosti sa Pravilnikom o organiziranju Islamske zajednice u BiH u dijaspori.

**Član 35.**  
(Pravilnici)

(1) Odredbe koje nisu regulisane Statutom regulišu se sljedećim pravilnicima:

- a) Pravilnik o radu Skupštine,
- b) Pravilnik o radu Džematskog odbora,
- c) Pravilnik o radu Nadzornog odbora,
- d) Pravilnik o radu Izborne komisije,
- e) Pravilnik o izborima,
- f) Pravilnik o radu Statutarne komisije,
- g) Pravilnik o vakufu,
- h) Pravilnik o disciplinskim mjerama,
- i) Etički kodeks za zaposlenike u organima IZBiH.

(2) Pravilnike donosi Skupština Džemata natpolovičnom većinom.

## **IX. PRELAZNE I ZAVRŠNE ODREDBE**

**Član 36.**  
(Osnivanje podorganizacija)

(1) Džemat ima pravo osnivati udruženja, organizacije ili akcionarska društva, u okvirima zadataka i djelatnosti definisanim u članu 6.

(2) Odluku o osnivanju i načela rada donosi Skupština Džemata.

(3) Saglasnost na Statut iz stava (1) ovog člana daje Džematski odbor.

**Član 37.**  
(Prelazne odredbe)

(1) Džematski odbor nastavlja sa radom od devet članova do sljedeće redovne Skupštine 2021. godine.

(2) U slučaju da se, zbog ostavki ili slično, do sljedeće redovne Skupštine 2021. godine smanji broj članova Džematskog odbora neće se vršiti nadopuna novih članova sve dok Džematski odbor ima četiri ili više članova.

(3) Nijedan član Džemata ne može biti član istog organa ili komisije više od osam godina uzastopno. Pravo na kandidaturu u neki organ Džemata nemaju članovi koji su u tom organu bili članovi šest godina uzastopno. Izuzetak su izbori 2021. na kojima se mogu kandidirati članovi koji su već u tom organu bili šest godina, ali samo na skraćeni mandat od dvije godine. Ponovno pravo kandidature u taj organ dobivaju nakon pauze najmanje od četiri godine.

(4) Skupština će izabrati privremenu Izbornu komisiju od tri člana na mandat do sljedeće redovne Skupštine 2021. godine. Članovi privremene Izborne komisije nemaju pravo kandidature u bilo koji organ na sljedećim izborima.

(5) Izbori 2021. godine mogu se održati u martu, ali prije redovne Skupštine kako bi se mogli ispoštovati izborni rokovi predviđeni Pravilnikom o izborima.

### **Član 38.**

(Tumačenje statuta)

(1) Tumačenje Statuta je u nadležnosti Skupštine.

(2) U slučaju nejasnoća u pogledu primjene odredbi ovog Statuta, između dvije sjednice Skupštine, njihovo tumačenje daje Džematski odbor, na prijedlog Statutarne komisije.

### **Član 39.**

(Izmjene ili dopune Statuta)

(1) Izmjene ili dopune Statuta su u isključivoj nadležnosti Skupštine Džemata i iste se vrše na način i po postupku njegovog donošenja.

(2) Prijedlozi i inicijative za izmjenu ili dopunu statuta dostavljaju se Statutarnoj komisiji.

### **Član 40.**

(Izmjene pravilnika)

(1) Izmjene i dopune pravilnika koje je Skupština Džemata usvojila su u nadležnosti Skupštine Džemata.

(2) Prijedlozi za izmjenu ili dopunu pravilnika dostavljaju se Statutarnoj komisiji.

(3) Odluke o izmjeni pravilnika se donose natpolovičnom većinom prisutnih članova na Skupštini. Prijedlozi izmjena i dopuna pravilnika prije upućivanja na Skupštinu trebaju biti na javnoj raspravi u Džematu.

(4) Izmjene pravilnika stupaju na snagu od narednog dana od dana njihovog usvajanja.

### **Član 41.**

(Raspuštanje Džemata)

(1) Skupština Džemata donosi odluku o pokretanju procedure za ukidanje Džemata. Odluka se donosi dvotrećinskom većinom prisutnih članova na dvije uzastopne skupštine od kojih najmanje jedna mora biti redovna.

(2) Odluku o ukidanju Džemata donosi Rijaset Islamske zajednice.

(3) Zatečeni višak prihoda nad rashodima se predaje IZBuŠ-u.

### **Član 42.**

(Stupanje na snagu)

(1) Ovaj Statut, kao i izmjena ili dopuna ovog Statuta, stupa na snagu nakon što dobije pismenu saglasnost Rijasetu IZ u BiH.



(2) Stupanjem na snagu ovog Statuta prestaje važiti Statut usvojen na redovnoj Skupštini Bosanske islamske zajednice Stockholm održanoj 19. 01. 2003. godine.

**Član 43.**

(Datum usvajanja)

Ovaj Statut usvojen je na Skupštini Džemata, održanoj dana 28. 11. 2020. godine.

Stockholm, 28. 11. 2020. godine

Predsjednik Skupštine

Mustafa Šetkić

